

崑新兩縣續補合志卷十八

集文

集文之志所以存一方之文獻也或文以人傳或人以文重要必脩辭樹義有當於古人立言之旨者乃足以信今而傳後則決擇不可不慎也吾崑自嘉道以先名流輩出鴻文鉅製多有專集行世志乘所采九鼎一鬻耳庚申以後故家藏書燼於兵燹庠序之材但沈淪於帖括而稽古之士漸稀然有心濟世留意於一邑之利弊者猶不乏人今擇其辭有體要者分別采錄爲集文後有編輯文徵以與志乘相輔者則鄉邦文獻之幸也

崑新兩縣續補合志

卷十八

集文

一

彭龍光創建石浦文節書院捐資序

代

蓋聞登賢先德行鄉學不可不崇華國重文章講院不可不設石浦鎮雖偏隅僻壤然攷宋太師秦國衛文節公生長是鄉發祥伊始文章經世開甲第於玉峯簪紱起家耀功名於珂里參政裕安邊之識白簡鋤奸退閒築後樂之堂青宮賜額洵足焜煌史冊式煥詞林爲後生所心儀仰儒先而神往者已今則書堂音渺西園跡荒芹藻風微簪纓望杳卽爲讀書種子異等茂才辛苦寒羶艱難長鋏三閒廡下伯鸞低頭百尺樓中元龍氣短欲負笈而無自思居肆其何由徒令造轍閉門著書仰屋秋風席帽慣唱惱公寒夜糠燈絕無同志思今望古良可慨焉乃有朱君春

泉者願居後學樂溯前徽六甲將周一丁粗識身居白屋  
念苦志於雞窗派衍紫陽思家風於鹿洞一則慨先哲之  
遺風堂留友順一則憫窮鄉之面壁士盡寒酸爰特邀集  
隣近諸同志議於本鎮賤字圩莫如觀舊基改建文節書  
院幸叨梓里願奉瓣香今先慨捐田二百畝以租籽之入  
備獎勵之資奉鄉先達爲楷模斯爲嚆矢期都人士之興  
起鼓其文風然而創始不易經費綦繁白傅大裘尙當集  
腋杜陵廣廈猶待儲材几夫給札有資授餐有費諸生之  
膏火山長之束修款必籌先事宜善後而況義塾須添童  
子免豬奴之戲字會宜整簡編免蠹蝕之遺起魁星閣以  
助文光崇先賢祀以勵頽俗几茲數事宜彙一區約需費

崑新兩縣續補合志

卷十八

集文

二

二千餘金蟻慕久殷願持區區以畀鳩工匪易尙期源源  
而來伏祈大宰官身讀書善士扶持雅化提唱斯文或助  
高腴以濟硯田之惡歲或傾囊橐共結文字之新緣所望  
努力捐資剋期興事嘉獎士類媿美前賢羨東海之科名  
看誰鵲起繼亭林之學術同奮蛾功惟道是崇以文爲會  
義利啟鷺湖之講不徒科第誇人斗牛射文筆之光定看

狀頭還我

光緒十三年乙酉三月同人公啟

### 朱紹成錢節母苦節瑣記序

瑣記一編錢孝廉冕堂述其生母之苦節也母鄒氏年十  
六侍慕韓先生舉丈夫子三而寇亂作先生挈家避北鄉  
居無何以絕粒殉臨終謂節母曰我死一家老幼責盡在

汝時先生母夫人嚴夫人張均老病不視事長子被掠仲季俱幼流離困苦莫此爲甚節母則葬先生於祖墓竭十指之力以養老字孤辛酉嚴太夫人喪竭蹶殯葬癸亥官軍進攻崑山賊益出沒不常方是時人皆不常厥居節母攜二子挾譜牒晝伏叢篁夜則走視張夫人病會夫人死乘夜座之乃北走露宿風餐及至常熟境聞崑城復仍歸舊寓適長子遯回急命檢張夫人遺骸備棺與先生合葬節母之上送三喪備歷艱危如此烽煙甫息卽爲諸子擇師就學脩脯不足縫紉以償時米石萬錢鍼黹所得輒飽諸子而已則吞飢忍凍率以爲常嘗大病不省人事忽自言桑椹可治食之而愈人以爲神佑迨江南大定歸居城

中薄田數畝至是始得租籽以具餽粥不十年三子均遊庠以次婚配諸孫繞膝人謂節母可息肩已不意伯與仲相繼物故煢煢孤寡又費經營節母之下撫諸孤備嘗勞瘁又如此今夫飲冰茹蘖教子奉親貧家婦以節自守未有不苦者也若節母於倉皇兵火之中完送死養生之責可謂尤處其難今冕堂雖名列賢書門牆日盛而節母依然寒素仍日以勤儉督兒孫且慮安樂之時易忘危苦也時時以從前所歷爲家人縷晰言之冕堂於是錄爲一冊名曰苦節瑣記詞不修飾所以存其實也書成請爲之序紹成以不文謝則固請因念居同里閨幼時獲慕韓先生教避寇時同在北鄉於節母之事知之較詳爰質言以發

其凡讀者取其事之真勿笑其文之陋可也

宣昌緒與支少菴書

頃許織生世兄來以邑尊照會見示云來說妥以便稟復僕竊怪之人情之洽不洽不應問僕既蒙下問則有不得不爲足下陳之者夫育嬰善舉也布米小民衣食之源也諸君子現奉邑尊照會議舉育嬰所以甞生機革惡習意至美也然自是士大夫分內事未可以責之小民也勿謂爲數細微上可以廣憲仁下無損於小民也彼窮櫛下戶貧女弱丁不知費幾許辛勤始得此一絲一粟而忍輕爲此論乎攷之於古北魏孝昌北周靜帝時皆嘗稅入市者人一錢百姓嗟怨綱目書其事以垂炯戒今以張浦言之

小民入市者不負米卽抱布者耳此事一行幾於無人不捐強其所不願責之以必從創興善舉之名董事居之蚩蚩者不得爭也而欲人情之允洽得乎織生又云現已合得百會每會五十文元非專恃捐項此亦掩耳盜鈴之意也米捐姑勿論第以布捐較之月出一會祇五十文布少之家日賣一匹月已捐至六十文月出三會止一百五十文布多之家日賣三匹月已捐至一百八十文且如所收捐項已敷開銷則會竟可以不出卽出矣開銷不盡積有盈餘經手非其人借以牟利者有之挪以他用者有之久之徑化爲烏有先生而捐終無免期維彼小民始事者何以謝之有一事必有一事之理諸君子果以理揆之則此

事之行其不可蓋有七焉布米爲小民衣食之源不權輕重率議抽捐一也小民之家有不能自舉其嬰者皆所宜保也因保嬰而先歛其錢舛矣二也事名行善迹近厲民三也朘小民之脂膏襄地方之善舉名實不符四也請捐之初必稱人情允洽實不能家諭戶曉使無違心五也與於會則有力可以隨緣坐以捐則無告不能寬免六也董事一時之權宜小民無窮之實累七也此七者有一於此卽礙於理而況兼有之乎且前之停捐誠知其非義也未久而復之豈以爲合義乎僕不知諸君子究何所見而處心積慮必爲此而始快也總之名爲善舉萬無累及小民之理諸君子不必問人情之洽不洽也先自問此心之安

不安足矣於僕何有哉今者邑尊心誠保赤可謂民之父母窮閭疾苦諒所周知乃以創興善舉反累小民亦必非其心矣如以僕言爲是卽應直陳利弊稟復邑尊請罷前議保嬰一事第合同志以集善會一依前人成法大以成大小以成小自無不可如僕之言竟無一當請就諸君子所見確然有利無弊之處宣之廣眾卽以示僕使僕自悟所見之偏曉然於諸君子之果以仁心爲仁術尙何曉曉不已爲哉足下之舉於鄉也鄉之人皆謂上天有眼則以足下讀書敦行不預公事故也今旣不能不預則一方之利病一己之聲名均繫一事之得失未可苟且以嘗試也誠欲集思廣益鄉之中豈遂無老成名德碩學深識可以

咨訪其人者若專就一二未嘗學問皇皇求利紈袴市井之曹引與計議決無好事做出也僕老矣非樂費唇舌也以與足下世交義兼師友宜効忠告耳蓋嘗謂讀聖賢書志存利物義利公私之介辨之宜嚴家國天下之故思之宜熟苟處一事必求其心之安而不惟意見之是執當得志時必行乎我之素而不爲習俗之所移能如是也異日服官從政必有可觀僕素有虞於足下故縱言至此足下見之不笑以爲迂也則幸矣

宣昌緒再與支少菴書

頃奉手書具悉布捐之請足下自有苦心而於僕前札所陳概未齒及第摘厲民二字詞氣微露不平意者足下不

以僕言爲非是特訝持論之不無過當耶守朋友責善之義而自忘其無狀此僕之戇也足下不以爲甚忤猥以狂夫之言目爲義正詞嚴信乎足下果不以僕言爲非是也足下之虛懷如是僕敢自外乎請就來書之旨畢其說以敬告足下足下之請布捐實援在城米捐之例夫以善堂而有米捐詎謂法良意美然較之布捐猶爲彼善於此何以明之米以石起捐大戶居奇屯積小戶則零星散糶者多布以匹起捐小戶月再上機大戶則自着始做米雖賤石必滿二千捐七八文未爲苛布雖貴匹不過四百捐一二文卽爲累是故以事言之布捐不可米捐猶可以理言之米捐猶不可布捐烏乎可是說也嘗與建中言之矣足

下聞之否乎足下謂保嬰吾人陰隲事是也而欲得布捐以預備灾歉則非也彼小民之家大抵租田耕種者耳秋稼登場租繇卽至仰事俛育實恃布匹以資接濟詩人有詠之者矣其詞曰窮年芸人田租去才噉粥又曰布成莫待雞鳴後明日晨炊缺米薪境真情迫何其言之悲也其中清門嫠婦垂老無依寒閨貧女零丁孤苦潔一身以守禮賴紡績以自存春日載陽鶯花不識寒宵風雪燈火常熒匹布之成一縷一血淚也是皆無告窮民王政所必先乃以地方善舉并此無告而朘削及之是藉窮民之血淚培吾人之陰隲也惜無以此言告足下者耳使足下早聞此言亦必惻然有動於心而并無此請矣足下布捐之請

固爲辦事之難而毅然以非有所利爲言足下非有所利足下不言僕自能信之若辦事之難何止近來國初名臣則亦有然者也張清恪公之請立社倉也我聖祖仁皇帝諭大學士等張伯行條奏宜立社倉前李光地爲直隸巡撫亦曾請立社倉朕諭此事言之甚易行之甚難爾姑試行後果無成效倉庫粮帑設官專理尙且虧空社倉所收穀石百姓收貯寺廟虧空又何待言耶夫社倉朱子良法文貞清恪又皆道學中人然又行之數年迄無成效早在  
大聖人洞鑒之中則創始之時未足盡辦事之難也僕爲足下籌之保嬰一節就眼前以做眼前亦有無甚難者昔南昌鄧君雲鶴歲以館穀之餘捐錢十千偕同學集善會

勸留溺嬰每嬰助錢三千行之三年鄧聯捷此真陰隲事也何不仿而行之頃見貴邑龔君保嬰會啟有云分拄杖之費拯墮甕之危其詞其事均極得體所列規條盡善盡美張鎮儘可照章辦理經費不敷酌量增減保得一嬰卽一陰隲事何多求焉若必計及後來則或初姑試行得好施者襄成善舉或積貲待用及取用時仍歸無着皆未可知與其經費無着之時勉強爲之何如姑做眼前之爲愈也事求經久必得同志數人以維持之足下之用心猶鄧君也足下所與共事有如鄧君之同學者乎如陶如劉雖數十百人總無足恃知其必無能應而不別求實心爲善之人謀所以持其後則勢必有挹彼注此之時恐不能爲

灾年之備矣又況足下始之不必有能如足下之用心者以繼之何用朘削小民之脂膏置之虧空不待言之地乎足下自謂迂濶僕謂非迂濶也迫於集事未暇思其卒也足下慮及灾年則事更有急於保嬰者無已則恪遵我聖祖此法始於朱子僅可行於鄉村之諭旨用社倉之法而爲積穀之謀乎要之言之則易爲之則難多一事不如少一事姑俟臨時以圖補救而已士君子仁心爲質一切匡困資無矜孤恤寡有可爲則爲之無在非陰隲也有惟日不足之心而又有行所無事之用則幾矣事名行善迹近厲民僕言亦稍激矣雖然鎮無殷戶衣租食稅子弟讀書未嘗無一故家曷爲如鄧君之同學者并無其人五十一



願派及市井如陶如劉寫而復縮未必不有所藉口人情相似則亦無如之何維彼小民僅請邑尊一示便可強所不願責以必從民何所知難保其不以爲厲已也怨不在大以古爲鑒則有北魏北周之已事矣足下姑平心察之無徒訝僕言之過當也擬請告退極是春闈在卽青雲直上得時則駕宏此遠謨則展盡底蘊時也區區小事接辦自不乏人何足以煩足下哉布捐一事果不復行是足下一大陰隲事不但有從諫如流之美矣至謂當事者不能辭謀利之名而第求心之無媿僕不敢以爲然也竊謂當事者必求心之能安而不第求心之無媿第求無媿不謀利斯無媿矣安則未也凡事豫則立古名臣興利除害實

先取一事之前後左右上下四旁通盤打算靡不審詳必也揆之我心而安揆之人心而安揆之于萬世之人心而安然後起而行之聲色不動功成而事立民受其賜身名俱泰不則其人心本無他舉事一不當卒以病國殃民者何代無之足下年富力強前程遠大慎勿執是言以自足也布捐細事僕顧爲此灌灌者亦願足下卽小以見大異日服官從政知所措手以造福蒼生而已又以前之停捐實因僕言至煩諸君議復虛衷下問僕若隨聲附和則嗟怨之來將叢於僕僕老矣此咎不能任也輒復貢其狂悖如此荀子曰非我而當者我師也是我而當者我友也僕未有知敢謂所言之皆是也願足下有以教之

宣昌緒與崑邑尊書

爲提捐剝民籲請停止事竊生寄居張浦歷有年所比聞該鎮廣澤堂義塾提捐布米每匹每石各二文賣者出錢牙行經手董事知會牙行者係生門人許雲龍許薪翹當詢以地方善舉何事累及小民始出客冬范前憲告示示生先是未經張挂者也竊見所據堂塾董事原呈中有董等承辦修橋施衣施藥等事該鎮向有布米兩業內抽本布每匹二文六陳每石二文由社董經理現擬撥入堂塾以資各項公用云云竊謂堂塾開銷均有田產事非應辦何煩兜攬必朘小民之脂膏以襄董事之善舉此不可以爲訓至該鎮向來並無布米捐項而乃巧立社董之名據

作抽捐之證此社果何社乎此社董者其公舉乎其世傳乎公堂有無照會歷年是誰充當一切不還實在徑以子虛烏有聞之宮長爲請捐計得矣如清議何且混稱布米兩業並不分別賣買賣實指捐所由出范前憲忠厚待人如呈給示僅云示仰董事及牙行知悉並不及各鄉民戶者亦認捐出牙行而不謂其實取之耕氓織婦也夫矯誣其事以藉口模稜其詞以請示非誠也牙行諭及而不過經手鄉民諭不及而反任出錢非公也年來糧食卡捐奉文停止仰見國家軫念元元無微不至蚩氓感動矧在士人卽吳鄉各鎮難保無借公剝民捐及布米者要亦市井所爲詎謂法良意美地方紳士不能持正議以革時弊亦已

過矣奈何歛怨一方擱然作俑竟出善堂義塾其謂之何  
生以兩生名列原呈曉以布米爲小民衣食之原捐滿六  
文卽缺小口一日之糧今歲棉貴布賤窮檐下戶事育維  
艱加以日剝月削數雖微細究妨生計促其呈請停捐則  
皆委咎於呈首許輝時許輝任青浦縣學生立移書規之  
竟如充耳蓋皆居養素優未識民間絲粟來處頗不易也  
生居是鄉雖久亦客地方利病非所宜言獨念此事之行  
兩生自在局中心術所關難安坐視又以該鎮諸生多及  
生門聽其以規爲瑱空言遂已則少年喜事益無顧忌爲  
敢縷陳管見籲請出示曉諭立着該鎮堂塾布米提捐卽  
時停止無任沿爲成例永無已時以窒弊源而除民累

錢邦彥與謝綏之書

綏之仁長先生執事彥 株守淞左未嘗趨侍左右然自丁  
丑冬山西助賑曾隨張丈文齋兩次赴安節局繳款得聞  
吾郡有大善人馬嗣後凡遇各處災歉未嘗不額手西望  
想見大善人舉動今夏在都寓曹子笙先生處見山東截  
畱婦女出境捐冊又係執事與徐宋諸君首先倡募愈益  
敬慕且藉曹先生得悉執事生平今秋大雨霖霖河流暴  
漲江浙半爲澤國至厯聖念並垂憲慈以爲被災之區各  
受賑卹矣乃彥於二十七日入城聞執事與盛巽卿先生  
書垂憐敝邑并以崑新同境異情之故代爲訾訝彥聞之  
不覺奮袂欲代各鄉罄鴻急爲鳴訴而苦于才拙力薄不

能爲鵠面鳩形輩聊效手足之勞愧憤交集竊惟吾邑東南西三鄉民情怯弱樂安無事知有縣官不知有大憲府撫二字常欠分曉

每以知府爲府臺不復知有巡撫

以故詣縣告訴者一

經批斥聲息俱屏縱至餓死斷不敢再詣府藩稟訴其實九十兩月赴縣告災者未嘗絕于道也不意省中竟以無人告災疑爲全熟幾至浩蕩國恩獨使崑民不得沾被冤何如之今不得不將三鄉被災情形詳述於執事之前冀藉大有力者代爲將伯之呼統觀全縣田中行船者不下五六十里自東南門外東薄新洋江南至三江口縱得十餘里橫得七八里崑邑天區也岸上積水深者四五尺淺者二三尺亦間有露岸者其禾用長鎌割取倒于田者隨

水東西或沈或浮望如野鳧其穗之發黑腐爛者其人之膚裂孔血因而傷病者種種不堪言狀然此猶非至低者也至低者在西南鄉大慈鎮左右西薄雙洋潭南踰白蕩東逼吳家橋陶家橋楊湘涇北達注浦東北並千墩南北二十里東西二十里其地塘浦縱橫湖瀆重襲居民鮮少室如懸磬大水歛至有牆坍塌倒者有苦蓋逐流去者有藉船爲室任風漂蕩者有旅屨他村朝起撈割夕則露宿者有繫戀舊居眠食漬水雖腹脹脛腫不顧者現在撈穗以食析薪以爨且補眼前瘡他日撈無可撈勢必束手待斃非甘于如此也蓋以僻處窮鄉距城有一宿程而又岸沒路斷者音信不達聖上發帑之諭彼目不睹也大憲卹

民之政彼耳不聞也一二在鎮董事非狃于意見卽別挾  
褊衷而長官履勘又以棚高船大且阻於睥目皤腹之書  
差僅一至千墩而已鄉閭實在苦楚情形無由目擊彥以  
爲大慈左右前後四十里間實無異新陽周墅石牌最低  
窪之十二畝也此而不賑又安可賑者他若瀕淞之周巷  
張浦自三江口迤東之孔巷陸家浜泗橋天福菴蓬閭鎮  
以人量之水沒脛沒腹不等時已十月稻未登場來年菽  
麥菜花全然絕望歲底尚可支持來年四五月無所得食  
矣其待賑者十之六七又如花家橋安亭境三區地號岡  
身產木棉十之七稻十之三霖雨五十日木棉畝僅數斤  
女工失職買粟無資其待賑者十之四五彥家處兩邑之

間崑新水災輕重實所洞悉用敢呼籲于大君子之前以  
安三鄉父老惟大君子憐而察之

彭龍光崑新水利考

崑新于蘇屬地最窪下偶遇水災小民卽爲魚鼈其水以  
吳淞江爲主吳淞故道郊亶以淺汙不能通洩羅列江南  
江塘浦涇瀆當濬者條分縷析崑新居十之五六震川亦  
云復吳淞故道務令濶深水勢洪壯與揚子江埒則餘水  
可不勞餘力二公之論固屬不刊然觀邑志自大觀元年  
許光凝檢按松江古跡蔬導積水入海逮後屢濬屢湮不  
下數十次江身愈狹受水愈少疏濬愈難工費愈鉅其故  
由沿江居民貪圖私利圍占田廬或潮漲沙積茭蘆叢生

歷數百年莫可蹤跡欲盡如二公議必致紛擾工大而費鉅效遲而害速非言有不善實事勢不同也宋淳熙時疏至和塘開澱山湖以洩吳淞之水明夏尙書周文襄及傅潮林文沛孟紹曾等皆著成效至隆慶六年縣令申思科濬塘浦涇二十二萬歷十六年副使許應達開諸塘 國初屢次濬大瓦浦濬至和塘濬南北瓦浦東西澤塘皆以分吳淞之勢而爲民計也崑新地勢大要洩西北界之水在至和塘而塘岸諸浦涇宜疏通也洩東南界之水在澱山湖而湖口諸港汊未可淤塞也大工難起牧民惟擇其至要至急者圖之而已至於三泖淤塞汪洋巨浸盡變芟蘆上流白蜺江澄湖澱湘等入海諸水泖不能受莫由宣崑新兩縣續補合志

卷十八

集文

十四

洩則尤爲今日之急不獨區區崑新患也

彭龍光清丈議

崑邑自兵燹後圖籍散佚田則糧數淆亂不清前年聽業戶自報領取清單類多差誤業戶亦時有隱匿復立更正局遷延半載迄無定見經費一牧再收羣議譁然今則上臺委員催迫而銳意清丈矣然動關數百萬之命稍或不順爲害非細試舉其弊而約言之吾崑向有虛賣實收之弊如田十畝賣者希圖美價推糧八畝得主完八畝之賦而收十畝之利棄主則挂二畝之糧輾轉相授莫能窮詰業主苟有勢力佃戶復侵鄰界所耕種實得十畝以外有利於此必虧於彼一弊也經造田冊曰莊書奸詐者從中

舞弊或升蕩爲田或降田爲蕩淆亂斗則爲需索業戶之地或託過的戶未滿其欲田屢易主冊仍舊名亦有業戶賄囑不立的名而造假名俗稱爲鬼戶又或莊保有田在本圖區分或圖田之利己者將其糧飛灑他戶受其累者鄉愚爲多以致詭寄者享無糧之產賠累者輸無產之糧二弊也凡田之斗則準以地之肥瘠雖不盡然亦不相遠今失冊區畧上田則輕下田則重有本熟而注爲荒者有荒墳廢宅老荒而反注爲熟者其意蓋謂勘丈甚難蒙混不清易圖奸利三弊也至於坍沒之田西南鄉爲甚以其湖蕩相間也道光初年勘丈奸胥豪蠹玩法作奸順其願則於應坍之外而故加拂其情則於應坍之內而故損不

公不均盈縮在手現未失冊之坍沒仍沿其弊又有其冊已失竟以乾隆時之坍沒冊湊報者與今田懸甚 國家減賦而窮民增糧四弊也欲清弊藪不得不丈然尤有難者任事之人公明非易旣公且明尤必細心釐剔親身勘步方能杜除諸弊以冀一勞永逸否則足不履阡陌地不知縱橫厭其煩苦徒憑莊保之冊書算手之數以耳爲目純趨捷徑必啟草率貿亂之病倘或報丈不公致起訟端覆丈則全功盡棄此董事之難也勘丈必賴其熟悉其地之圖長以爲眼目奸胥往往妄報以圖射利鄉愚無知之輩竟有受其攀累而來者於事何補亦有鄉里姦猾賄囑差役而應命者勢必以公濟私借法作奸以縱其欲貽害

非細此圖長之難也凡地形曲直難齊屋宇參差相間引繩就墨積算煩累報弓者或上下其手書算者或故爲增減毫釐之差分寸之誤而賠累固已無窮此弓算之難也知其難而杜其弊則在賢司牧之銳意更始立法勸懲以期有濟而尤賴鄉人士之至公至明才守兼優者以分任其事自古無無弊之法而在乎用法之人至弓口尤宜致慎以昭畫一大則國課有虧小則窮民貽累寧寬一點毋刻三分是在賢父母之實心實政而已

黃元炳清丈議

蒙垂議清丈一事崑新自兵燹以來各圖魚鱗細冊大半散失田畝多少斗則高下無可稽查或憑業戶報明或由

莊保約略以致失冊諸圖缺少田額三萬五千畝有奇使不行清丈何由釐正但初恢復後有借清糧爲名每畝收費八十文其實並未清丈不過據所報田畝造方單給業戶而又遷延不給領者十不得一以致眾口紛紛旋又飭董議行而費反無所出則公議斗則各鄉驗派核算糧額酌定上中下三則此不過一時權宜之計缺額仍無歸着此今日清丈之不容再緩也但清丈爲利民起見而其弊有不可不剔者夫以一無憑準之田畝區畫有法經界釐然卽每畝四十夫亦何多而民間藉口以爲有前車之鑒夫前事亦何能深究但其中有曾預前事者祖臺明察必能深警諸人俾之毋蹈覆轍蓋此數人者實總大綱成敗



所關不能不慎選其人也總董既定各鄉必舉鄉董有轄三四圖十餘圖不等者其人亦須公正廉明爲一鄉表率苟有與總董瓜葛夤緣謀幹者率皆閒散無業希圖薪水且爲自己隱佔起見豈能實心任事必細加釐剔毋令總董徇情舉報每圖必派圖董丈書至彼俾之履畝領丈收繳丈費其人皆安分小民薄有資產勢不能與鄉董抗何論總董要必善爲體恤察其勤惰辨其莠良而賞罰之毋任鄉董上下其手指揮勒措蓋自古良法美意行之者不得其人則迄無成效所以選人爲第一要著至於步弓之大小前康熙中清田時已有縮弓縮弓之法各鄉廣狹不同今若一例施丈則此鄉準必彼鄉多彼鄉準必此鄉少

又向有四六分蘆價田今亦混入斗則無可指明丈定後必且爭認以滋事端此又不得不預爲商榷者也祖臺軫念土田虛懷下問以期清步口定賦額正已紊之疆理垂永久之則壤芻蕘一得敢謂有當於採擇也謹議

黃元炳崑新錢糧平議

崑新財賦之區錢糧正額每縣各數十萬然歷代以來民皆急公奉上屆開徵時各以應完之數米則赴倉銀則投櫃清繳後卽給串歸農著爲常例自浮收之弊起所繳之數不敷始不免假手於漕書以俟完清給串厥後習以爲常於將開徵時漕書先向各戶支取更不必自行到縣此庚申以前之通弊也兵燹之餘剗爲著佃完納之法謂業

戶遠徙來歸或本係客縣恐其延宕著保向佃戶扣除每鄉各撥差役坐圖收繳於是悍吏之勢橫行地保之狡黠者助之爲虐每逢差至騷擾一鄉佃戶唯唯從命苟一齟齬則擁至舟中無名之費倍於正額不待聞於業戶而已任渠勒索矣故有歷年完清而不給一串者佃戶不敢向彼索串也且比年開徵過早版串未齊卽令業戶自封投櫃亦無執照反令蠹胥得以朦混作弊夫縣令豈眞仇民而護胥哉初亦謂著保著胥可以起色而不知地保之差費出其中胥役之侵蝕出其中徙損閭閻之膏血而無補於國家之正供也今但令先完者卽給版串未完者著保嚴催而不至則籤提如是而不自封投櫃者未之有也然

亦有孤寡下戶僻處鄉隅不識縣門願附地保代納者是  
在善體之而已

錢邦彥三吳水利今說

自來言吳中水利者自宋迄明不下數十家而得其要領者惟震川氏最爲近之震川氏產於崑山而僑居安亭者也熟復吳淞古道故言之最確震川之言曰三吳之水瀦於太湖太湖之水泄於吳淞江蓋太湖西受溧水溧陽宜興諸水西南受宣州諸山谿所奔注滙爲三萬六千頃之巨浸而吳淞江則專導太湖之水以入海者也不復吳淞江古迹則太湖之汎濫不定三吳之田畝不治不開濬婁江則太湖之汎濫仍不定三吳之田畝仍不治何以言之

蓋湖水壯盛吳淞不能獨泄故奇分爲婁江東江東江既不可攷則分泄湖水者不得不藉婁江婁江不特泄太湖水也江陰常熟北受長江之水瀦爲陽城昆城湖巴城湖傀儡湖此數湖者皆由鹽鐵吳塘清水江以達婁江以入海婁江不濬則數水皆亂婁以入淞而淞江漲溢泄水不快三吳之水愈不治矣且婁江之入海近而捷淞江之入海迂而緩何以言之婁江自崑山逾太倉入海度不過五十里吳淞江自清洋江口迤東南經安亭黃渡上海之閘口抵吳淞口入海計有一百五十里一百五十里猶非迂緩也吳淞江南奇分爲白蜆湖澱山湖泖湖經婁縣之閔巷迤北由黃浦達吳淞口以入海則三百里矣古時白蜆

湖澱山湖皆由千墩浦北流以入吳淞泖湖之水由大盈浦北流以入吳淞故太湖水之出海猶近而捷今返南流繞出婁縣之境以北達吳淞則迂而緩矣吳淞兩岸之縱浦皆西南上而東北下如淞水之清洋江夏駕浦瓦浦皆導淞水以入婁以達海者也今皆越而南流矣皆由淞婁下流壅噎不濬故也自洋人開置碼頭吳淞既不可治矣獨有濬治婁江一策耳婁江出海之口南北相距不過三十里而迂捷不同若此此開濬婁江所以爲治吳水之上策也

蔣兆麴論縣設裁判糧稅所利弊

自封建改爲郡縣刺史守令位卑任重而小官少大官多

亭林顧氏謂小官多者其國治大官多者其國亂于是乎著郡縣論以爲封建弊變郡縣郡縣弊不可猝復封建計必于郡縣之中寓封建之意擇賢令長能子養億兆者試用三年稱職授以一邑俾君其上臣其民次設丞一人遴邑之有學行者試用稱職滿歲爲真令或物故及无賢子孫卽以丞補一屬太守而省司道以上官是說也誠平治天下權時揀弊之上策也我朝之設官也仍前制以縣令爲親民吏撫字教道催科治獄一責其成職綦重權彌輕層累而上者若府司道若督撫不下六七大員事關學校則牒學使按涉戒行則稟提鎮轉漕則糧儲貢獻則織造得可一大人袞袞羣公不諾也則囊金以貨之由竇以通

之雞鳴狗吠以悅之均可迺已閒或弔賀問候來往送迎而長吏席不暇煖輿无息肩戴星而出篝燈而還金錢我所以長子孫也利財烏得不亟餘且弁髦之耳尙何怪邑宰之庭訟者林立案積几充棟冤呼徹天而上溯東京循吏撫綏教養化行俗美蒼天黃泉遼哉遠矣今也政府懲官制之失積弊之重儼刑獄別設裁判所財賦別設糧稅所實一員一以杜貪一以懲酷聽一訟令不得信口雌黃必眾可而後決辦一漕令不得乾沒文錢惟有司之是職如是庶獄無寬囚吏無姦臧乎我不敢知也何也圓冠絀如大裙襜如坐而堯言起而舜趨六七鉅公如故也令與二司誠賢邪則同寅協恭羣策有濟各盡厥職毋敢越畔

太平不足致也不賢邪一雄倡百雌和同利相求同惡相濟狡兔之計三窟奧如對百姓曰力縣其如大僚何謁大府曰權分其如掣肘何如此而冀官方整肅民譟召父是猶曲表以求直景卻行而欲前趨也爲利爲弊當无俟智者辨之矣然則如之何而可曰舍亭林說无復長策何則今之涉仕途者若稍有天良下車不无善政可觀迨見斥于大吏則如夢斯覺曰我五日京兆耳民與我何豫中材且然違問腐敗不肖之墨吏哉若亭林之策則土我國也民我子也剝民以自奉猶割肉以充腹也賢者固不忍出此卽不賢者亦能自爲身圖而勉行公道民庶幾其蘇乎於乎吳凜淮南悉坐謀反誅者也蠲租屢見書矣彼大逆

誠不道養民之政何可厚非无他民其民也何忍傷之然卽觀漢郡邑之制縣有相有長有丞有簿上之爲郡郡有諸曹掾史從事別駕又上則刺史京師則三輔京兆尹左馮翊右扶風東京乃更設司隸校尉耳當時守令治稱天下第一如吳公文翁召信臣龔遂之流何可勝數雖不得國而壓制者尠得以便宜行事而成其治所謂小官多而大官少也若今之新政舍豺狼而狐狸是問利邪弊邪未之或知

朱紹成都城崑新會館補記

邑中當京官者康熙中徐氏最盛司寇公以宿學望重罔羅俊彥與虞山翁氏競勝得人稱盛然皆僦屋以居未聞

有所建置今所置者乃咸豐初李刑侍清鳳集款以爲五十年來中經兵燹而徐氏後裔輒斷斷以會館爲司寇捐建則誤矣是不可以無記考邑中自李刑侍留京供職由闡費局籌款若干緡儲都中西盛興錢鋪收其息爲會試入京者僦屋之資道咸間方擬集成鉅款買地建屋而該店歇閉存項無着刑侍乃竭力追之抵得琉璃廠左近官房一所計瓦屋三進凡若干間於是由邑中敦善堂滙款至京通加修葺改爲崑新會館比落成適朱硯生京兆以鄉舉報咸豐乙卯季秋之月也自後凡引見謁選以及上公車試京兆者皆賓至如歸無復經營棲止之勞顧館雖屬之崑新而產則仍歸官業每年必繳部銀若干兩否則

仍歸官管前功盡棄自是歷由仕京者更迭爲主以官俸劃抵或邑中無人留京嘗託郡人吳君景萱代爲主持費無出則招人賃住以租抵部同治初京兆以編修供職悉如舊章旣而詢知凡屬官產能將應繳租價總繳十年卽可給予部憑作爲民業永不徵租於是京兆函致本籍時董敦善者爲朱君九蘭乃籌銀三百兩餘滙至京都赴部繳訖領有憑曰給翰林院編修朱以增收執自是會館始全爲吾有然則是役也創之者李刑侍成之者朱京兆自乙卯以還閱十六七年更易數人而始克就緒可見公事之不易爲也光緒壬午京兆視學奉天乃舉以畀李編修傳元俾之爲主今又二十餘年矣科第旣衰留京者益復

寥寥雖其閒歲修之資與居守之需皆由善堂支應然經拳匪之亂聞已漸就傾頽邇者編修以葬親回里議定此後無論京外各 凡有事於斯館者仿長元吳常昭江震舊例以官職之崇卑定捐銀之多寡勒石善堂永以爲例所以爲斯館計者亦云周矣無如王路難遵仕途常塞近且時事日非茫茫北顧正不知斯館之能否常留也紹成得其詳於京兆因補爲之記以正徐氏之裔之誤并使後人得藉以考鏡云

按李刑侍領鄉薦在道光壬辰丙申成進士方 科會試與婁東友人爲伴時太倉已有會館旣至友人招與同入婁人逐之大受誚讓賃屋以居於是誓願勸建力

不逮則由闡費局籌錢若干縉存店生息初意原欲積成鉅款買地興建不意錢店歇閉幾至無着幸其時供職刑曹設法提迫得此官房一所其願乃償然則斯館之成刑侍之力爲多於徐氏乎何與

以增附注

### 朱培源陳墓鎮開濬市河記

吾鄉居元崑之交市河界於中南北流其支港岐出於東西者五皆不深濶而市河爲民廛所蹙尤狹而淺昔咸豐二年嘗濬之用功不周閱今三十餘年日就淤墊中間洿經髮匪之亂室廬焚蕩者過半牆壁之傾圮瓦礫之墮落蓋亦多矣每值夏秋旱暵流不盈尺舟行澀難飲汲穢濁就載不通疫癘滋起居人咸病之爭願醵貲募徒疏濬會

有淮揚人之傭食於吳者挈攜徒侶來就役作爰乃計方以酬食分地以定工始自北東迤南而西周乎四方分爲六段其施功也段築兩堰用洩內水其有不盡閒值港汊因而重之或更旁截填淤悉祛續治次段後堰旣成前堰始撤蟬蛻鱗接由漸而暨濶自二尋以至四丈深自二尺以至三尺疏決壅滯因地裁量期於泄惡流清永蠲夙患粵於壬辰七月二十五日興工閱四月而竣凡計長七百六十有八丈合土方三千八百有四十又以餘力葺石橋一修治水柵五增植者一前後用緡一千七百串有奇眾輸得十之六餘則取於善堂之贏款裒益得宜羣以爲允總其事者陳孝廉思九等而賦役巡功句稽斂散則陳君崑新兩縣續補合志

卷十八

集文

二十四

仲菴爲最勞工旣成孝廉以書來告且曰今者諸堰旣徹外湖灌輸澄波來會演漾四達民食其利向者所患悉已祛矣子盍爲之記予惟通川大渠官爲督治費易集而事易辦宜也今吾鄉之濬市河出於民所自爲非有長吏之籌措與夫勞來而督率之也然而費不外求役不暫息畚揭所萃卒底於成蓋由知義者之多而同力合謀勤敏趨事又略無乖牾於其閒此則風氣篤厚殆有過於他境者予故樂爲之言而又喜其規畫之善可爲後法用撮舉崖略而并系分段濬治之詳暨眾戶輸貲之數於後俾來者有攷焉

彭龍光斃賊被難記



青浦未克復時澱湖濱虬澤諸村當賊衝民居焚過半遇害被擄者什二三時陳墓賊盤踞鎮上炮船林立每十百爲羣由澱湖過者無虛日過必擄民舟猝不及避卽罹禍因相與謀堵塞湖口諸要路爲防禦計約有警則鳴金相救援三月初一日村民負鋤耒荷畚揭築虬澤港及徐涇港堰適有賊自青浦來者羣譁然擊之斃長髮紅衣賊三人於舟卽投填堰下初二日復有賊舟二自陳墓來者又擊之獲一舟斃長髮紅衣賊二又填之餘三人俱哀告曰實係陳墓王文竹差往青浦幹事者賊已盡斃吾輩俱隣近業舟者察其言不謬王某者邑監生賊初至時首倡進貢授九門御林僞指揮汪昌福者也當是時聲勢煊赫生

殺惟命凡西南鄉賊中事無鉅細皆決之拂其意則傾家指不勝屈以故咸畏之縱之去凡三日堰成而禍自此亟矣初四日晨喧傳王某欲勦滅諸村人心惶惶然猶未深信謂稍有天良必不出此詎意午後王某首領炮船三十餘至虬澤徐涇等處縱放鎗炮大聲喊殺村民見賊蜂至各驚潰至有跌折手足殞命者任意擄掠下至釜甑農器悉罄且使鎗匪周國華等四出搜索聲言拿獲多人橫加敲掠而坐堂皇箕踞南面者則髮鬚鬢繫黃巾王某與卡賊某也時諸村民俱避匿十里外所至處慮事波及咸下逐客令以是民大困且值農事方興在外非久計不得已各村地保仍懇王某調停照圖繳錢共番銀一千四百枚

事得解而民益困且彼此不敢復云擊賊矣是役也被害最烈者虬澤徐涇夏段三村次則小漁田全河潭等被楚掠鎖辱者監生王吟葉附生莊靜卿之傭工某李愛亭等暨客居虬澤青浦附生金守溪等七人而余以先人殉難後閉門索居深慮殃及池魚亦挈家避外一月噫冤已

彭龍光育德義塾記略

吾里育德義塾自同治己巳年始由陳墓鎮朱九蘭齋尹惟沅創捐田畝復藉諸善姓續捐而成者也塾室係萬壽菴西偏餘地向有頽屋三楹經咸豐庚申年髮匪亂半燬於火因葺而新之增構兩廂乃延師聚徒先儘孤寒其無力從師者亦入焉經費則以每年田租收入除完賦并虬

崑新兩縣續補合志

卷十八

集文

二十六

澤徐涇兩義渡工食船費外咸歸塾用復病室宇湫隘前年先築石駁岸十餘丈今春鳩工庀材添構堂室三楹邊廂二以爲師徒課讀之所迄今二十九年矣前後修築共用緡錢一千串有餘皆歷年租入所餘銖積寸累而成者而飲水思源則朱齋尹創善之功爲不可沒云惟願後之經理斯塾者實心任事永遵弗墜俾鄉僻童蒙孤寒子弟得以稍涉詩書咸知禮讓後日或冀得所成就是則能體創始者之深意也夫

朱紹成留蔭軒記

軒何以曰留蔭鄉約同人公建以報廖公也公名綸字養泉四川巴州人讀書好道兼工書法以增生襄曾文正戎

慕奏保知縣同治戊辰秋季奉檄來權新陽篆時衙署儻南街民居公初至前令未去乃權寓留暉門水次倉漕書以糧戶舊欠請徵不許冬初遷入原署散卷觀風詩文外並詢新陽利弊時紹成亦條上數事皆見采納明年夏新秧初插水驟發農民犇告公卽日履勘雖極窪處必假田家小舟舁入田中親驗淺深一面督民庠救趕築圩岸且禁止各鄉演劇有請於公者曰敬神演戲係屬向例否則恐歲或不登公曰神聽極聰必不爲禍竟嚴禁之歲亦有秋方公之在曾幕也卽慕晚香潘隱君學行以爲其賢可上繼家孝定及以築圩遍歷北鄉乃訪隱君之子勤補於梅心涇得隱居遺文讀之益信其服膺孝定最深於是就

玉山書院左知止山房遺址剏爲家孝定祠以家慎幾公及潘隱君分東西配凡十一人祠外翼以兩廊名曰敬一亭亭南東向爲門顏曰相在園右廊之南曰君子舫與敬一亭相對舫外闢地爲池引水灌之擬種芙蓉舫左要以牆闢洞爲門題曰知止池之左壘土爲基將買石以築小山雜植松柏桃柳及四季花卉之屬堂之後種梅數十株虛其中俟建樓以祀節孝仁節兩先生蓋欲復山前三祠之舊觀也經營甫定公忽以內艱去任時庚午秋九月也先是公仿藍田呂氏集士子二十四人設鄉約於祠中以家鈞石先生爲約長徐洪生先生爲主講與約者人授一簡各記學業所得或時事之可議者每月一會會必講經

在約者輒以所記呈閱於公或公之行政有失當處亦直書不爲忤且速改焉諸人議論有不合理者公必力爲辨正其於同約中實有互相切劑之益公旣去約中有不能愬然於公者乃集貲於君子舫後西向接以小廊別構一室奉公位面南以祝長生崑學師青浦王孝廉榜曰留蔭軒示不忘也光緒紀元公署無錫縣事紹成以秋試道出其閒謁公官舍贈絕句兩章且以先祖妣分葬事實請公表墓時錫邑蠶桑甚興至今民賴其利其在新陽所捐置桑樹數萬株自己丑水災淹沒殆盡城中惟公桑局一區尙食其遺利而已旣又量移海州壬辰癸巳之間公請老以賣字度日重至崑山寓居數月再題孝定祠楹聯捐置

祠田四十餘畝撰記勒石並撰紹成前請之墓表端楷交還俾買石以鑄之時鄉約同人大半物故而公於是時年亦七十有五求書者猶戶履恆滿也未幾公回籍迄今又十餘年矣同約中僅紹成與李君家蘭二人公卽健在亦將百歲翁矣中原多故新政繁興祠雖倖存往往借作辦公之所卽留蔭軒亦多恐不能保也然則飲水思源公之爲功於吾邑也當永永不忘爰縷述之以俟後人之請祀名宦云

錢邦彥祭因築鐵路被發古塚文

維光緒三十一年歲在乙巳二月之吉具官某並率邑人某謹用嘉蔬清酌致祭於前明東阿教諭楊素定先生諱

豫

暨其子常德府知府太僕少卿兵科給事成化丁未進

士少卿先生諱

瑛

孫旦海先生諱

九齡

曾孫伯子諱

一鶚

仲子諱

一夔

之靈曰嗚呼呼世代遷流陵谷變易古人所歎

抑又何悲迺者孔道陵遲夏甸之良田廣宅忽灑為洿池  
漢疆之溝洫河渠條堆為岡阜不獨秦始皇墳見掘於多  
積樗里子墓胎禍於建宮今仿洋人法廣築鐵路迤至嘉  
定縣河字號五畮日字圩楊先生四代塋域實當其衝石  
獸含冤而自恫翁仲緘口而不言神道橫斷於荷插英靈  
呼籲而無門里後學某等灑泣荒郊憫憐無地飭匠鳩工  
重規建置啟攢皆慕道之鄉人扶櫬非主鬯之後裔冥漠  
君之墳幸遷於後人桓司馬之槨竟毀於一旦今自東阿  
崑新兩縣續補合志

崑新兩縣續補合志

卷十八

集文

二十九

君以下共櫃二十二具徙葬於本域神道之前石獅猶然  
夾道山向亦準初年四尺之崇封佳氣鬱鬱半畝之茂蔭  
豐草芊芊嘉粟一簋春韭一盤楊氏四代之神歆此薦筵  
嗚呼哀哉尚饗

崑新兩縣續補合志卷十八